



## STINAPA TA INFORMA

DOS POS NA FRANSIA

Danilo Christiaan, ku su 38 aña e dinámiko 'projectmanager' di Mangasina di Rei aki a biba un bida interesante. El a nase na Kòrsou, su tata ta di einan i su mama ta di Boneiru, prosedente di hendenan konosí di Dos Pos manera Pedon i Banban Sint Jago. Durante su infansia nan tabata bin pasa dia regularmente na Dos Pos. Ku su 15 aña el a bai Hulanda ku su famia i despues di skol el a bai biba i traha na Fransiá den e área di "Montagne Noir". Aunke el a pensa pa studia ekonomia, den e área ei ku a ponele kòrda riba su Dos Pos stimá, su interes pa agrikultura a lanta kabes. "Mi tabata realisá ku tempu ku mi a lanta kasi no tabatin interes pa naturalesa. Pero rondoná di e naturalesa interesante ei, ku riu i palu grandi i bèrdè, mi por a sigui prosesonan di agrikultura di aserka, for di e simia te ora ku e mata pari fruta. E proyekto ku mi tabata traha aden tabata prosesá forel di e riu i planta berdura i fruta. Tabata un "oefenbedrijf" meskos ku Mangazina di Rei ta awor. Hóbennan tabata bin siña i turistanan tabata bin wak". Bèk na Hulanda el a bai studia "Tropische landbouw" na Larenstein, Deventer. Den su stazje e tabata na Marokko i isla Tenerife, paisnan seku meskos ku Boneiru. Voral Tenerife a impreshon'é; e isla ei tin un banda hopi seku i un otro bèrdè bèrdè. Nan ta inventivo einan, nan tin un "Cactus Park" ku kaktùs di rònt mundu. "Un idea pa Boneiru tambe?" e ta puntra su mes. Pa su afstudeeropdracht Danilo a bin Boneiru pa investigá kiko por hasi ku un área manera Rincon riba tereno di agrikultura. Ora ku su kasa Heleen (ku kende e tin dos yu muhé awor) a bin bishit'é, e no bisé nada den direkshon ei te ora ku Heleen mes a puntra "Lo no ta dushi pa biba akinan?" I t'asina a pasa tambe. Puntrá pa su opinion tokante kambio den naturalesa na Boneiru, Danilo ta konstatá ku hopi kunuku ta ser bandoná i ta kombirtiendo bèk den mondi. "Lamentablemente hopi hóben no tin pasenshi ku mester pa agrikultura, pero na Mangazina di Rei afortunadamente tin algun bon eksepshon, i nos ta purba guia i yuda nan. Hopi kos bo no por siña den buki, i nos ta purba pasa e konosementu ei pa nan. Riparabel ta ku e konosementu ku nos grandinan tin ei ku científicamente ta ser yamá "indigenous knowledge" ta algu ku ántes tabata ridikulisá, ta paresido mundialmente. E ta kòrda ku un señora hende grandi na Fransiá a bisé pa no kòrta un palu pasobra luna no tabata bon. Ta un kos ku na Boneiru nan tabata sa tambe, i ku awor tin base científico. Sierto temporada di luna mata ta mas aktivo i ta rekuperá mas lihé. Si Danilo por a bin ku un regla pa yuda Boneiru, e lo kier a bin ku lei ku ta prohibí pa rosa mondi sin mas. Na lugá di esei por kòrta mata i pasa nan den "shredder" ku ta mocha nan fini fini. Si stroi esaki bèk den tera e tera ta mantené su fertilidat. Tambe mester sigui ku programanan di replantashon. Asina nos lo wak un Boneiru salú!

*Skirbí pa Marcel Nahr*

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURALESA



**Traha huntu na un desaroyo duradero pa Boneiru**